

## Weisheiten aus dem Land des Lächelns

Omm letzde Freidaachmoie habb ichs Kättche uffem Markt getroffe. No Kättche, wie gehders dann?, habb ich se gefroocht.

Sie hott ze Antwort gewwe: Ei gut, außer dass ich moi Last mettem Schorsch habb, der will nämlich widder emol abnemme.

No ja, saach ich, dess wär nitt schlecht. Der hott joo ewe enn mords Bauch. Awwer die gonz Zeit woldder nix vom Abnemme wisse. Wie kimmderr dann jetzt uff oomol druff?

Ei, sächts Kättche, der will abnemme, seider mett so emm Chines geschwätzt hott.

Ich muss e bissi dumm geguckt hawwe. So, mettem Chines hotter geschwätzt? Wie is-sen dess kumme?

Dess Kättche hott ihn Korb uff die Erd gestellt unn gesaat: Ei omm Mittwoch hott de Schorsch enn Spaziergong in die Kolonnade gemacht. Uff oomol iss enn Monn uffen zukumme, ewe der Chines, unn der hotten Schorsch gefroocht - iwwerichsens hätt der gonz gut deutsch gesproche -, die Batterie von seine Armbonduhr wär kabutt unn ob de Schorsch wisse det, wer emm mettere nei Batterie helfe kennt.

Ei gehn Se mol mett merr, hott de Schorsch gesaat, ich zeichs Ihne. Unn er hott den Chines zu dem kloone Lädche mett dem Schlisseldienst gefiert unn gesaat: Doi droi kann Ihne geholfe werrn, ich habb dort aach schunn e Batterie oisetze losse. Der Chines hott sich bedonkt unn iss in den Lade enoi. De Schorsch awwer hott sich im Rewe e Tass Kaffee gehollt unn hott sich onn so enn kloone Disch gesetzt, unn uff oomol iss aach der Chines mettere Tass Kaffee in de Hond kumme, hott sich newern Schorsch gesetzt unn die zwaa hawwe minonner gebabbelt. Der Chines war enn schlonke Monn, unn als se ferdisch warn mett Babbele hott de Schorsch beschlosse, e paar Kilo abzenemme.

Ich saach: Der Chines hottem bestimmt verzählt, dass er onnerst esse dut unn dasser desweeche so schlonk iss. Merr sächt immer die esse so vill Reis, die Chinese, awwer vor allem esse die Gemies, Fisch unn Geflüchel, Ente hauptsächlich.

Ja, moonts Kättche, doodriwwer hawwe die zwaa aach geschwätzt, awwer dess hott nitt de Ausschlaach gewwe ferrm Schorsch soim Entschluss ferrs Abnemme.

Ich habb gemoont: No ja, de Chines werrdem aach verzählt hawwe, dass iwwerall wo se sinn, ob uff de Strooß odder im Büro, so Üwunge mache, Tai Schi odder wie dess heeßt, dess mächt aach was aus ferr die Figur.

Ja, sächts Kättche, doodriwwer hawwe die aach geschwätzt. Awwer dess wars immer noch nit, was de Schorsch bewooche hott, endlich abzenemme.

Ich muss e zimmlich bedepert Gesicht gemacht hawwe unn frooch: So, was wars dann?

Jetzt hotts Kättche gegrinst. Weil der Chines hottem Schorsch verzählt, er hätt sechs Kinner. Unn doodruffhie hott de Schorsch de Chines oogeguckt unn gesaat: Ach desdeweche sinn Sie so schlonk? Bei uns sächt merr, ein guter Hahn werrd selten fett.

Ja, dess sächt merr bei uns, habb ich gesaat.

Ess Kättche druff: Unn was der Chines dann gesaat hott, hott de Schorsch so getroffe dasser jetzt unbedingt abnemme will. Weil de Chines hott voller Weisheit gonz fernöstlich gelächelt, hott uffem Schorsch soin dicke Bauch gezeichnet unn gefroocht: Und Sie, Sie nix mehr Kikeriki? Eiern Honnes.